



UKA 2018/171

31/10-2018

Nivi Olsen

Nuna tamakkerlugu iliuusissatut pilersaarummik, meeqqat inuusuttullu sumiginnarneqartut ikilisarnissaannut sammititamik Naalackersuisut kingusinnerpaamik UKA2019-imi suliaqarnissaat pillugu, Inatsisartuni aalajangiiffigisassatut siunnersuut.

(Inatsisartuni ilaasortaq, Sara Olsvig, Inuit Ataqatigiit)

(Siullermeerneqarnera)

Aallaqqaammut siunnersuuteqartoq qutsavigerusupparput manna siunnersuut pillugu.

Qujanaqaaq tamakkiinerusumik isiginnilluta pinaveersaartitsineq sammileratsigut, meeqqanik inuusuttunillu sumiginnaasarneq millisarumallugu aammali immikkoortuni allani.

Tamatta akisussaaffigaarput meeqqat inuusuttullu nunatsinni iluamik inuuneqarnissaat.

Taamaattumik siunnersuut manna ilalernartipparput nuna tamakkerlugu iliuusissatut pilersaarummik, meeqqat inuusuttullu sumiginnarneqartut ikilisarnissaannut sammititamik sananikkut meeqqat sumiginnarneqartarnerat akiorneqartussaammat.

Angajoqqaat kisimik sumiginnaaneq ajorput. Meeqqat aamma inuusuttut pisortanit aamma sumiginnarneartarput. Tamanna MIO-mi meeqqat illersortaata kingullermik naqitertitaani atuarneqarsinnaavoq, tassani oqarmat ukiut 25-t matuma siorna Kalaallit Nunaata atsiqataaffigisimasaa Naalagaaffiit Peqatigiit meeqqanut isumaqatigiissutaa unioqputinneqartartoq.

Immikkoortut pingaarutillit 18-t malissallugit pisussaaffeqarpugut, malinngilagulli. Tamanna isornarluinnarpoq ajornartorsiutaallunilu.

Taamaattumik siunnersuuteqartoq isumaqatigaarput, Naalackersuisut Meeqqallu Illersuisuat oqarput pisariaqartikkippat piffissaq ungasinnerusooq isigalugu ataatsimoortumik iliuuseqarnissarput sapinngisamik amerlanerpaat peqataatillugit, qularnaarumallugu tamatta aamma piaarnerpaamik isumaqatigiissummi artikiliit ullumikkut malissinnaanngisagut malissinnaalerumallugit.

Naalackersuisut akissumminni allaapput kommuninik, taakkualu inunnik isumaginnittoqarfiinik oqaloqateqarlutik aallartissimallutik taamaaliorlutillu atugassarititanut oqartussaasoqarfinni assigiinngitsunik sulialinni, meeqqat inuusuttullu pillugit suliasani pitsaanerusumik suleqatigiittoqarnissaanut, kommunit ajornasaartarnerannut annerusumik paasisaqarnissaq siunertaralugu. Neriuppugut suliniutip tamatumap pinaveersaartitsinermit suliat aallartinnqareersimasut pitsaanerusumik suliarineqalernissaat aamma aqqutissiuukkumaaraa.



Demokraatini isumaqartuaannarnikuuvugut ilaqutariit ataatsimoortillugit nukittorsarneqartassasut meeraq kisiat aallaaviginagu. Taamaattumik nuannaarpugut Naalakkersuisuni ilaqutariinnut politikiliornissaq siunniunneqarsimammat, tassani ilaqutariit ataatsimut isigalugit kiisdalu meeqqap attavii tamaasa peqataatillugit taamaasillutillu iluarsissuteqarnissanut suleqataatillugit.

Sumiginnarneqartut ikilisarneqarnissaannut nuna tamakkerlugu iliuusissatut pilersaarusiortoqarnissaani, sulinermi suliniutit pioreersut aallaavigineqassasut Naalakkersuisut isumaqarput. Ilaannakoortumik tamanna isumaqataaffigaarput. Takusinnaalluarparput siusinnerusukkut misilitakkat iluaqutaasinnaasut taamatullu suliniutit aallartinneqareersimasut, kisianni uani siunnersuummi siunertarinqanngilaq nutaamik eqqarsarnissaq. Taamaattumik siunnersuuteqartoq isumaqatigaarput nuna tamakkerlugu iliuusissatut pilersaarummik sanasoqartariaqartoq kikkut tamaasa ilaatillugit, tassa imaappoq naalakkersuisut tamaasa pinngitsoqaratik ilaassasut, peqataatitsineq piginneqataanermik misigisimalersitsisarmat. Misigissuseq taanna pingaaruteqarpoq tamatta anguniaratsigu iliuusissanut pilersaarummut malinninnissarput, soorunami tunngavigalugit ataqqillugillu Killiliisa, MANU Iliuseqarasuartarnerillu pillugit suliat.

Taamatut oqaaseqarluta siunnersuut ilalerparput inassutigalugulu siunnersuut akuerineqassasoq kiisalu Ilaqutariinnermut Peqqissutsimullu Ataatsimiititaliami oqallisigilluarneqarumaartoq.